



Sanctus Leodegarius optimis literis & morū sanctitate adeò excelluit, ut à Francis Heduarum præsul ordinatus fuerit. Hanc functionem magna diligentia & pietate administravit. propterea factum, ut reges Francorum sæpius hunc pium Episcopum suis consilijs adhibuerint. Cum autem Clotarius rex anno Christi sexcētesimo septuagesimo tertio esset mortuus, atq; filius eius Theodericus in regno successisset, multæ turbæ per Galliam excitatæ sunt. Rex enim totus ignaviæ deditus, Ebroinum quendam rebus præfecerat. qui magna tyrānide sacra & profana miscebat. Hoc cum S. Leodegario & alijs proceribus Francorum di-

spliceret, atq; regem & Ebroinum sui officij admonerent, ne forsitan Childerico regi Australiæ, & Theodorici fratri tota regni administratio traderetur, Ebroinus hanc admonitionem ferre non poterat. Itaque locum & opportunitatem quærens, pium hunc præfulem per insidias aggressus interfici curavit. Verùm scelus illud non inultum mansit: nam proceres regem & præfectū officio depositos monasterijs incluserunt, atq; Childericum regem cōstituerunt. Paul. Aemil. Otto Fryf. lib. 5. cap. 7.